



Quartu cumbatit po binci sa violèntzia contras a is fèminas e po s'amparu de is diritus.

Ònnia annu, su 25 de Onniasantu, s'afestat sa Dii internatzionali contras a sa violèntzia asuba de is fèminas, assentada de maneda ufitziali is su 1999 po mori de is Natzionis Unidas, chi iant scioberau custa data po arregordai sa vida, s'impinnu e prus che totu sa balentia de tres sorris, Patria, Maria Teresa e Minerva Mirabal, annomingiadas "mariposas", chi iant donau sa vida cumbatendi po sa libertadi de sa Repùblica Dominicana, sa Natzioni insoru. Ocannu Quartu onorat a custa dii cun unus cantus initziativas pratzidas in totu sa cida.

Duus atòbius su 23 de Onniasantu. Po sa manifestatzioni "Insieme per l'inclusione contro la violenza", is assòtzis sardus Queer APS e UniCa LGBT, cun s'agiudu de su Comunu de Quartu Sant'Aleni e de su Presidenti de su consìgiu de sa Regioni Sardigna, chi punnant, totus e is duus, a promovi su respetu is diritus de s'umanidadi, ant cuncordau unus cantus traballus po amellorai is sedilis pùblicos, chi afigurant inclusioni e sensibilizatzioni.

A is sedilis, chi s'agatant in logus prus de importu, in is diis a beni, nd'at a essi liada sa pinta, e ant a essi torraus a pintai. A is 10:00 est prevìdia s'incingiadura ufitziali de sa pratza de is Diritus innoi at a essi acrarau su chi bolint nai is coloris nous de is sedilis, po donai unu messàgiu forti a sa comunidadi in contu de inclusioni e respetu de is diritus de s'òmini. Est agradèssiu s'agiudu de sa genti po chi is operatzionis de

mantenimentu siant fatas beni e de maneda trancuilla, e a pustis totus cumbidaus a pigai parti a sa manifestatzioni chi at a serra sa dii. Custu progetu s'agiudat a torrai a acrarai cantu sunt de importu unidadi e arrexonamentu po chi sa comunidadi si pesit inclusiva e solidali.

S'àteru atòbiu de sa gerrunada s'at a fai a merì. In sa palestra University in Pitz'e Serra ddoi at a essi s'Open day po sa difesa personali, postu in paris cun s'agiudu de su Comunu. Po sa dii mondiali contras a sa violèntzia asuba de is fèminas, difatis, est in programa unu merì de testimònias e dimostratzionis. In abertura Cinzia Carta, Assessora a sa Pùblica Istruzione, Isport, Innovatzione, Politicas de gènere e LGBT, a is 15:30, at a donai is saludas istituzionalis; a pustis provas pràticas de difesa personali de base; a úrtimu, a is 17:30, si fait logu a is testimònias, cun s'interventu de sa fundadora de s'assòtziu 'Insieme agli angeli' Katia Nicoletta Curreli.

Domìnicu 24 su Rotary Club Cagliari Nord promovit una manifestatzioni isportiva po noitzus. A is 08:30 at a partiri una passillada in bicicleta de giai 20 km, chi incumentzat in su CUS Casteddu (campus de Sa Duchessa, bia is Mirrionis) e arribat a su CUS de Quartu, in bia Perda Bona. De innoi si fait logu a sa cursa po noitzus aintru de su Parcu de Molentàrgius de 5 km.

Lunis 25 at a essi sa dii de "Quartu in Marcia contro la Violenza: Diciamo No, Diciamo Mai Più!". Sa caminada manna, aundi si previdit chi ant a pigai parti giai 1000 pessones, est bòfia de s'Assessoradu de s'Istruzione Pùblica e Politicas de gènere, con s'agiudu de sa Commissione oportunitades pariviles de su Comunu de Quartu, e ant a pigai parti is rapresentantis de is istituzionis localis, de is scolas e de is assòtzius de su logu. S'idea punnat a fai cresci su sentidu de is citadinus asuba sa violèntzia de gènere, e promovit una cultura de respetu e agualidadi, ca ònnia forma de violèntzia, siat de s'ànima siat de su corpus, depit essi cumbàtia cun s'imparu e sa muda de sa cultura.

S'incumentzat a mangianu po favorèssiri sa presèntzia de sa comunidadi de sa scola. S'atòbiu at a essi a is 9:30, con partèntzia a is 10 de pratza XXVIII Aprile. S'acumpangiamentu at a sighiri in is bias Vittorio Emanuele, pratza IV Novembre, bia Fiume, bia Polonia, bia Cecoslovacchia e bia Portogallo, si lompit a su monumentu contra is feminicìdius in su "Parco del Popolo Kurdo", aundi is studiantis ant a ligi messàgius, poesias e cantzonis, fadendi unu consideru asuba de sa gerrunada, de su positzioni chi tenit sa fèmina in sa sociedadi, su respetu de s'unu cun s'àteru e de is raportus de afetu inclusivus.

Àteru arbìtiu a megama. Su Centro Socio Educativo e Intergenerazionale bòfiu de s'Assessorau comunali po is politicas sotzialis e generatzionalis e obertu cun s'agiudu de sa Cooperativa Laurus organizat #educiamoalrispetto e alla non violenza, de is 16:00 a is 18:00 in pratza IV novembre, in is ùltimus mesis sèmpiri prus logu de atòbiu po piciocheddus e mannus. Sa citadinàntzia est cumbidada a pigai parti cun contributus personalis: imàginis, apensus, messàgius bellus e de ispera po cumbati sa violèntza asuba de is fèminas. Cun su matriali prodùsiu at a esi cuncorada una mustra in sa pròpriu pratza e in su Centru a costau.

S'urtimu atòbiu de custu programa aici arricu at a essi sàbudu 30 de Onniasantu e domìnicu 1 de su mesi de Idas in sa palestra Steptime, sèmpiri cun s'agiudu de su Comunu. Innoi puru s'ant a fai cursus de difesa personali a is piciocheddus e a is

fèminas. S'at a imperai su mètodu M.A.V. (Metodo Anti Violenza), una maneda ùnica de si furriai a is aciocus in su rispetu de sa lei italiana.

[https://www.comune.quartu.ca.it/novita/comunicati-stampa/8043-quartu-scende-in-campo-contro-la-violenza-sulle-donne-e-a-difesa-di-tutti-i-diritti?fbclid=IwZXh0bgNhZW0CMTAAAR2\\_IzdIAFVK0aZ1nJkbQ4-pngCMm3j4rqjKom7KYknoBqyZz3NW2rbKyJ0\\_aem\\_WCKjB0SB\\_dhINV7rhd25IA](https://www.comune.quartu.ca.it/novita/comunicati-stampa/8043-quartu-scende-in-campo-contro-la-violenza-sulle-donne-e-a-difesa-di-tutti-i-diritti?fbclid=IwZXh0bgNhZW0CMTAAAR2_IzdIAFVK0aZ1nJkbQ4-pngCMm3j4rqjKom7KYknoBqyZz3NW2rbKyJ0_aem_WCKjB0SB_dhINV7rhd25IA)